

# Pelajar UniKL MSI anjur program khidmat masyarakat

Oleh AZELI ALI  
azeli.ali@utusan.com.my

**P**ROSES pembelajaran bukan hanya berlangsung di dalam kelas dan kuliah tetapi juga harus ke lapangan untuk bertemu masyarakat bagi mendapatkan ilmu secara langsung.

Menyedari hakikat itu, Jawatankuasa Perwakilan Mahasiswa Universiti Kuala Lumpur Malaysian Spanish Institute (UniKL MSI) menganjurkan Program Khidmat Masyarakat Global (GCS) di Kampung Bantungcharern, Trang, Thailand dan Desa Galang Suka, Medan, Indonesia tahun lalu.

Program GCS di Trang diadakan pada 10 hingga 13 Mei manakala GCS di Medan pula berlangsung selama empat hari pada 20 hingga 24 Oktober tahun lalu.

Menurut Penyelaras Program itu Ezry Azirul Ezuan Mohd. Isha, objektif utama program itu adalah memberi peluang kepada penuntut UniKL MSI untuk keluar bertemu masyarakat dan memperkenalkan UniKL MSI kepada masyarakat luar.

Selain itu katanya, melalui program GCS itu, peserta berpeluang meninjau sendiri budaya dan cara hidup penduduk di Thailand dan Indonesia yang agak ketinggalan berbanding masyarakat Malaysia.

“Sepanjang program GCS ini, peserta akan tinggal dengan keluarga angkat yang dipilih dan mereka berpeluang menyelami cara hidup orang Thailand dan Indonesia yang sedikit berbeza dengan negara kita.

“Peserta juga mengadakan aktiviti keramayarakatan seperti gotong-royong membersihkan surau serta sukaneka dengan penduduk setempat,” katanya yang merupakan penuntut tahun dua Ijazah Sarjana Muda Teknologi Kejuruteraan Mekanikal (Automotif).



**EZRY AZIRUL EZUAN AHMAD AFIQ**

Tambah Ezry, ketika berada di Trang, rombongan seramai 14 pelajar dan lapan kakitangan UniKL MSI juga mengadakan lawatan ke Universiti Rajamangala dan meninjau kemudahan yang dimiliki pusat pengajian tinggi itu.

Sementara itu, di Medan, rombongan UniKL MSI disertai 32 pelajar dan enam kakitangan serta seorang pegawai daripada Majlis Amanah Rakyat (Mara) turut melawat Universiti Sumatera Utara dan Pusat Pelajar Malaysia di sana.

“Program GCS ini mendapat sokongan kuat daripada pihak Pembangunan Pelajar dan Gaya Hidup Kampus serta Unit Pemasaran UniKL MSI sendiri selain Mara dan Konsulat Jeneral Malaysia di Thailand dan Indonesia.

“Kami merancang untuk mengadakan sekali lagi lawatan ke Trang pada bulan September ini bagi memberi peluang kepada lebih ramai pelajar untuk menyertai program GCS ini,” ujarnya.

Selain GCS, UniKL MSI turut mengadakan program Jom Masuk Kampung yang memfokuskan penduduk Orang Asli di Rancangan Penempatan Semula (RPS) Air Banun dekat Gerik, Perak.

Menurut Penyelaras program itu, Ahmad



**PARA Pelajar UniKL MSI bersama-sama penduduk Orang Asli dalam Program Jom Masuk Kampung.**

Afiq Ahmad Zaki, masyarakat Orang Asli agak ketinggalan dari segi pembangunan serta kemudahan infrastruktur selain tinggal jauh di pedalaman.

Oleh itu, untuk mengelakkan mereka daripada terus terpinggir daripada hubungan dengan orang luar, program itu dirancang dengan kerjasama Jabatan Kemajuan Orang Asli (Jaka) bagi membolehkan pelajar UniKL MSI merasai sendiri kehidupan bersama Orang Asli.

“Antara program yang dilaksanakan sepanjang berada di Kampung Pulau Tujuh, RPS Banun itu adalah bengkel pembelajaran Matematik dan Bahasa

Inggeris, sukaneka, tayangan video motivasi serta jamuan bersama penduduk kampung.

“Selain itu, kami juga menyampaikan sumbangan berupa buku-buku serta pakaian terpakai kepada penduduk kampung yang rata-rata jarang menerima kunjungan orang luar,” katanya.

Tambahnya, pihak UniKL MSI juga telah merancang beberapa program bersifat khidmat masyarakat seperti itu bagi mendekatkan diri pelajar dengan orang ramai dan menjadikan UniKL MSI sebagai contoh dalam aktiviti khidmat sosial seperti ini.



**PARA peserta Program Khidmat Masyarakat Global (GSC) di Trang, Thailand bersarapan bersama-sama penduduk kampung.**



**PROGRAM interaktif dengan pelajar SD Kalang Suka di Medan, Indonesia.**